

आकाशवाणी जयपुर-अजमेर
प्रादेशिक समाचार
दिनांक 26.07.2024 समय: 18.45 बजे

- करगिल विजय दिवस री 25वीं वर्षगांठ रे मौके आज प्रधानमंत्री नरेन्द्र मोदी द्रास मांय ई लड़ाई रा नायकां ने सिरधाभाव सागे याद कीना।
- प्रदेश मांय ई करगिल वीरां ने नमन करी ज्यो।
- मुख्यमंत्री भजनलाल शर्मा विधानसभा मांय कह्यो- राज्य सरकार सरकारी मोल माथे बाजरा री खरीदी बाबत् विचार करेला।
- प्रदेश मांय केई ठौड़ां आज ई बिरखा व्ही-दौसा ज़िला रा मित्रपुरा मांय बिरखा रो पाणी भर्यां पाछे राहत राहत रा काम सरू।

000

देश सारू जान कुर्बान कर देवण वाळा रण-बांकुरां ने आज करगिल विजय दिवस रे मौके सिरधा भाव सागे याद कर्या जा रह्या है। ई मौके

प्रधानमंत्री नरेन्द्र मोदी आज लद्दाख रा द्रास मांय करगिल री लड़ाई रा नायकां ने सिरधाभाव सागे याद कीना। ई मौके प्रधानमंत्री कह्यो के करगिल विजय दिवस बतावे है के देश सारू दियो ज्यो बलिदान अमर व्हे है। वे आज वर्चुअल तरीका ऊं लद्दाख री शिनखुन ला सुरंग परियोजना रा काम रो उद्घाटन ई कीनो। ई मौके राज्य मांय ई न्यारा-न्यारा कार्यक्रम राख्यी ज्यो। मुख्यमंत्री भजनलाल शर्मा जयपुर मांय अमर जवान ज्योति शहीद स्मारक माथे राख्यी ज्यो कार्यक्रम मांय देश सारू जान निछावर कर देवण वाळा जांबाज फौजियां ने फूल चढा र याद कीना। मुख्यमंत्री वीरांगनावां रो शॉल ओढ़ा र मान कीनो। कार्यक्रम मांय करगिल री लड़ाई मांय हिम्मत सागे सिरकत करण वाळा फौजियां रो ई मान करी ज्यो। दौसा रा शहीद स्मारक माथे राख्यी ज्यो कार्यक्रम मांय उप मुख्यमंत्री दीया कुमारी फूल चढा र बलिदानी फौजियां ने सिरधा भाव सागे याद कीना। ई मौके वे दौसा मांय सैनिक कल्याण विभाग रो दफतर खोलण समेत फौजियां री न्यारी-न्यारी परेशानियां बेगी आगी करण रो भरोसो दिरायो। केकड़ी मांय पैली वाळा फौजियां रा संगठनां री ओर ऊं जय जवान जय किसान स्मारक माथे रण-बांकुरां ने याद करी ज्यो। देश सारू प्राण निछावर कर देवण वाळां री याद मांय ज़िला री सातोलाव री स्कूल अर जोरावरपुरा अर खानडरा गांवां मांय पौधा रोप्यी ज्यो। अजमेर रा विजय स्मारक माथे फौज रा तीन्धू अंगां रा जवानां री ओर ऊं बलिदानी फौजियां ने याद करी ज्यो। नीमकाथाना मांय वीरांगना कविता सामोता होशियार सिंह सामोता स्मारक, जे.पी. यादव स्मारक अर सुनील यादव स्मारक माथे सिरधा रा फूल चढाया। ई दौरान देश सारू जान कुर्बान कर देवण वाळां री याद मांय वां रा नाम परां पौधा रोपी ज्यो। बीकानेर मांय जिला सैनिक कल्याण कार्यालय री ओर ऊं शहीद स्मारक माथे राख्यी ज्यो कार्यक्रम मांय देश सारू जान कुर्बान कर देवण वाळां ने ज़िला कलेक्टर नम्रता वृष्णि री अगुवाई मांय सिरधा भाव सागे याद करी ज्यो। टोंक रा स्वामी विवेकानंद राजकीय मॉडल विद्यालय मांय सी.आई.एस.एफ. रा अहलकारां री अगुवाई मांय पौधा रोप र रण बांकुरां ने याद करी ज्यो। बालोतरा ज़िला रा बलिदानी फौजी भीखाराम मूढ रा गांव पतासर मांय वां रा स्मारक माथे फूल चढायी ज्यो। पाली रा शहीद उद्यान मांय शहीद स्मारक माथे राख्यी ज्यो कार्यक्रम मांय करगिल री लड़ाई मांय सिरकत करण वाळा पाली जिला रा पांच फौजियां रो शॉल ओढ़ा र मान करी ज्यो। वठे सिंज्यां री पोर मशाल रैली निकाळी ज्यी। बूंदी रा सरकारी कॉलेज मांय करगिल विजय दिवस रे मौके गोष्ठी राख्यी ज्यी। बाड़मेर मांय शहीद स्मारक माथे श्रद्धांजलि कार्यक्रम राख्यी ज्यो। ई दौरान बलिदानी फौजियां रा पिरवार वाळां रो मान करी ज्यो। कोटपूतली रा लाल बहादुर

शास्त्री राजकीय महाविद्यालय मांय फलदार, छायादार अर सजावटी पौधा रोप्यी ज्या। टोंक जिला मांय उनियारा उपखण्ड रा अलीगढ री सरकारी स्कूल मांय करगिल विजय दिवस रे मौके वीर सपूतां ने याद करी ज्या। करगिल री लड़ाई मांय जान देवण वाळा सपूतां ने दूणी री स्कूल मांय दो मिनट रो मौन राख र याद करी ज्या। जैसलमेर री स्वामी विवेकानंद राजकीय मॉडल स्कूल मांय दो मिनट रो मौन राख र रण बांकुरां ने सिरधा भाव सागे याद करी ज्या। नागौर मांय राख्यी ज्या कार्यक्रम मांय बलिदानी सपूतां रा पिरवार वाळां रो मान करी ज्यो। कोटा मांय एन.सी.सी. रा कैडेट्स री ओर ऊं नयापुरा स्टेडियम ऊं शहीद स्मारक ताई साईकिल रैली निकाली ज्यी। ई मौके जयपुर रा जवाहर कला केंद्र मांय केन्द्रीय संचार ब्यूरो री ओर ऊं आज चित्र प्रदर्शनी अर सांस्कृतिक संध्या रो कार्यक्रम राख्यो जा रह्यो है।

000

राज्यपाल कलराज मिश्र प्रदेश मांय कौशल विकास ऊं जुड़ी गुणवत्तापूर्ण शिक्षा ने बधावो देवण बाबत् कह्यो है। राज्यपाल आज जयपुर मांय राख्यी ज्या विश्वकर्मा कौशल विश्वविद्यालय रा पैला दीक्षांत समारोह मांय बोल रह्या हा। वे कौशल शिक्षा ने देश री माली बरकत री जड़ बताता थकां कह्यो के खुद रे पाण ऊबो भारत बणावण सारु विद्यार्थियां ने स्थानीय हुनर देवण री कोशिशां करी जावणी चाहिजे। जळसा मांय राज्यपाल स्नातक अर स्नातकोत्तर रा इम्तिहान पास करण वाळा 590 विद्यार्थियां ने डिग्रियां दे र नवाजी ज्या। ई मौके राज्य रा कौशल विकास मंत्री कर्नल राज्यवर्धन सिंह राठौड़ कह्यो के प्रधानमंत्री नरेन्द्र मोदी री पहल परां देश मांय एक करोड़ 40 लाख नौजवानां ने कौशल सिखावण दीरीजी है।

000

कौशल विकास अर उद्यमशीलता मंत्रालय री ओर ऊं काल जयपुर रा मालवीय राष्ट्रीय प्रौद्योगिकी संस्थान मांय जन शिक्षण संस्थान री क्षमता विस्तार रा बारा मांय ज़ोनल कॉन्फ्रेन्स राख्यी जावेला। इण मांय केन्द्रीय कौशल विकास अर उद्यमशीलता अर शिक्षा राज्य मंत्री जयन्त चौधरी खास पावणा रा तौर ऊं सिरकत करेला। ई कार्यक्रम रो मकसद लोगां ने उद्यमिता अर खुद रा काम धंधा करण सारु बधावो देवणो है।

000

मुख्यमंत्री भजनलाल शर्मा कह्यो है के राज्य सरकार सरकारी मोल माथे बाजरा री खरीदी बाबत् विचार करेला। वे आज विधानसभा मांय प्रश्नकाल रे दौरान बाजरा री खरीदी रा बारा मांय पूछी ज्या सवाल माथे सफाई देता थकां कह्यो के राज्य सरकार ई बारा मांय केन्द्र सरकार कागद लिख्यो है। इण ऊं पैली विधानसभा मांय आज सरकारी मोल माथे बाजरा री खरीदी रा मुददा माथे विपख रा सदस्य हंगामो कीनो। प्रश्नकाल रे दौरान बयाना ऊं चुणी ज्यी निर्दलीय विधायक ऋतु बानावत प्रदेश मांय बाजरा री उपज अर सरकारी मोल माथे खरीदी रा बारा मांय सवाल पूछ्यो। जवाब मांय खाद्य अर नागरिक आपूर्ति मंत्री सुमित गोदारा बतायो के लारला दो साल मांय लक्ष्य तैय नी व्हेवण रे कारण बाजरा री सरकारी मोल माथे खरीदी नी करी ज्यी अर साल 2024 सारु ई लक्ष्य तैय नी करी ज्यो है। मंत्री रा जवाब परां विपख रा सदस्य हंगामो कीनो। वां रो केहवणो हो के भाजपा सरकारी मोल माथे बाजरा री खरीदी रो वायदो कीनो हो। ई परां मुख्यमंत्री भजनलाल शर्मा कह्यो के मौजूदा राज मांय कुछ बगत पाछे पैली दफा बाजरा री साख आवेला, ई कारण विपख रा सदस्या रो हंगामो गैर वाजिब है।

000

चौमासा री रूत मांय प्रदेश मांय लगातार मेह बरस रह्यो है। राजधानी जयपुर रा न्यारा-न्यारा हलकां मांय आज बिरखा व्ही। टोंक मांय ई बिरखा रा समाचार है। मौसम विभाग आज बांसवाड़ा, बारां, डूंगरपुर अर सवाईमाधोपुर मांय कठे-कठे घणी ज़ोरदार बिरखा व्हेवण रा आसार जताया है। ई रे अलावा भीलवाड़ा, बूंदी, चित्तौड़गढ, झालावाड़, करौली, कोटा, प्रतापगढ, उदयपुर, नागौर अर पाली मांय ई कठे-कठे भारी बारिश री संभावना है।

महकमो काल अजमेर, भीलवाड़ा अर टोंक सारु ऑरेंज अलर्ट अर बांसवाड़ा, बारां, बूंदी, चित्तौड़गढ़, डूंगरपुर, जयपुर झालावाड़, कोटा, प्रतापगढ़, सवाईमाधोपुर अर उदयपुर जिलां सारु यैलो अलर्ट जारी कीनो है। दौसा जिला मांय लारला 48 घंटां मांय व्ही जोरदार बिरखा ऊं केई हलकां मांय पाणी भर ग्यो है। जिला रा मित्रपुरा गांव मांय व्ही जोरदार बिरखा रे कारण साखां पाणी मांय डूब ग्यी है। जिला कलेक्टर बतायो के जिला प्रशासन लोगां साता देवण सारु जरूरी जतन कर रह्यो है।

000

चौमासा री रुत मांय आज ई प्रदेश री न्यारी-न्यारी ठौड़ां पौधा रोप्यी ज्या। जैसलमेर मांय बी.एस. एफ री 92वीं वाहिनी रा जवानां री ओर ऊं वाहिनी मुख्यालय परिसर मांय 800 पौधा रोप्यी ज्या। नीम का थाना मांय ई एक गैर-सरकारी संगठन री ओर ऊं पौधा रोप र पर्यावरण बचावण रो संदेश दियो ज्यो। दौसा रा स्वर्गीय पंडित नवलकिशोर शर्मा राजकीय स्नातकोत्तर महाविद्यालय रा एन. सी.सी. विभाग री ओर ऊं कॉलेज मांय एक कैडेट एक पेड़ थीम रा तैत एक सौ पौधा रोप्यी ज्या। बूंदी रा महारानी राजकीय बालिका उच्च माध्यमिक विद्यालय मांय 101 पौधा रोप र वां ने मोटा करण री जिम्मेदारी दीरीजी। चित्तौड़गढ़ मांय हरित राजस्थान अर हरित चित्तौड़' अभियान रा तैत पुलिस लाईन परिसर मांय डोढ़ हजार पोधा रोपी ज्या।

000

राजस्थान निःशुल्क दवा योजना लागू करण रा मामला मांय देश मांय अब्बल रह्यो है। राजस्थान मेडिकल सर्विसेज कॉरपोरेशन री प्रबंध निदेशक नेहा गिरि आ जाणकारी दीनी। वे बतायो के जून 2024 मांय राजस्थान 76 दशमलव 78 अंक सागे पैला नम्बर माथे रह्यो। तेलंगाना 75 अंक सागे दूजी ठौड़ माथे रह्यो। राजस्थान निःशुल्क दवा योजना मांय मंजूरी करी ज्यी दवाइयां री तादाद अर न्यारा-न्यारा अस्पतालां मांय दवाइयां री उपलब्धता समेत न्यारा-न्यारा मानकां मांय सब ऊं बत्ता नम्बर हासिल कर र आ उपलब्धि हासिल कीनी।

000